



Mahein Nia Lian, Nú. 39, 28 Setembru 2012

**Programa V Governu Konstitusional nian 2012-2017
Paz, Estabilidade no Seitor Defeza no Siguransa**

I. Introdusaun

Iha 7 Jullu 2012, Povu Timor expresa ho forma livre no konsiente ninia vontade demokrátika, hodi apoia partidu tolu, atu nun'e bele asegura governasaun ba Timor- Leste, iha tinan lima 2012-2017. Rezultadu husi eleisoens lejislativas, permite V Governu Konstitusional hala'o nafatin konstrusaun instituisoens fundamentais ba Nasaun, ida ne'ebé pasífika no estável, hodi nune'e fó continuidade ba knaar tomak ne'ebé IV Governu Konstitusional dezenvolve ona.¹ Nu'udar konstitui iha Kontituisaun Repúblika Demokrátiku Timor-Leste (RDTL) governu ne'ebé nomeia tiha ona tenke elabora nia programa, no tau iha programa ne'e objetivu no tarefa sira-ne'ebé nia atu hala'o, medida sira-ne'ebé atu hola no orientasaun polítika prinsipál sira-ne'ebé atu tuir iha atividade governamentál nia domíniu ida-idak.² V Governu Konstitusional apresenta planu ba tinan lima nian 2012 – 2017 iha Konsellu Ministru no hetan ona aprovasaun iha loron 26 fulan Agostu tinan 2012.

Iha Mahein nia Lian Número 39 ida ne'e, halo análise ba programa V Governu Konstitusional atu hametin paz no estabilidade, partikularmente iha seitor defeza no siguransa. Ne'ebé preve iha Konstituisaun RDTL artigu 146 hatur forsa armada FALINTIL-FDTL garante independênsia nasionál, integridade territoriál no populasáun sira nia liberdade no siguransa hasoru agresaun ka ameasa externa naran ida, ho respeito ba orden konstitusionál.³ Nune'e mos artigu 147 difini Polisia defende legalidade demokrátika no garante sidadaun sira nia siguransa interna, no labele iha partidu polítiku. Prevensaun ba krime tenke halo ho respeito ba direitus umanus.⁴

II. Paz no Estabilidade

Povu Timor-Leste halo funu hasoru okupasaun estranjeira, iha tinan 24 nia laran, hodi bele restaura tiha ninia Independênsia. Nu'udar impaktu funu nian, mosu dezafiu sira ne'ebé úniku, ba konsolidasaun Timor-Leste nia siguransa interna, iha ona ukun-an nia laran. Governu nia objetivu maka, atu kontinua fo garantia katak, ita-nia povu livre duni ona, no katak, povu moris iha nasaun ida, estável no seguru, iha ne'ebé hotu-hotu hakruuk ba lei, nasaun ida ne'ebé asegura katak, iha justisa no siguransa ba sira ne'ebé vulnerável, iha sociedade laran. Governu

¹ Programa V Governu Konstitusional nian Lejislatura 2012-2017. Díli, 26 fulan Agostu tinan 2012

² Konstituisaun Repúblika Demokrátika Timor-Leste. Titulu IV Kapítulu II Governu, Formasaun no Responsabilidade. Artigu 108, pontu 1.

³ Konstituisaun RDTL. PARTE V Defeza no Siguransa Nasionál. Artigu 146 kona-bá Força armada. Pontu 2.

⁴ Konstituisaun RDTL. PARTE V Defeza no Siguransa Nasionál. Artigu 147 kona-bá Polisia no Força Siguransa. Pontu 1 no 2.

sei kontinua ninia esforsu, atu dezenvolve instituisoens ne'eb'e transparentes, responsaveis no kompetentes, iha seitor siguransa nian. Ita sei utiliza mos relasoens externas, atu garante siguransa ba ita-nia povu, no atu reforsa dezenvolvimentu ekonómiku, hamutuk ho viziñus no amigu barak ke ita iha, namkari iha mundu tomak.

III. Defeza

Governu sei garante katak, F-FDTL hetan kapasidade atu defende Timor-leste, hodi mos apoia siguransa interna, no bele fó sira-nia kontributu ba esforsu, atu hasoru ameasas ba paz no estabilidade, rejionais no globais. Governu sei kontinua halo avaliasaun, monitorizasaun no abordajem kona-bá ameasas transnacional (*katak, envolve no afekta nasoens barak*), hanesan krime organizadu, tráfico ba droga, terrorismu, degradasaun ambiental, alterasoens klimatikas no dezastre naturais, tanba buat sira ne'e hotu, bele tau risku ba sidadaun sira-nia vida. Iha tinan lima mai ne'e, governu sei orienta forsa armada, atu sai forsa de defeza profesional konvensional, iha kontrolu demokrátiku nia ókos. Governu sei reestrutura no reorganiza F-FDTL, atu bele garante kapasidades iha rekursu umanu, hodi bele permite nível ás ida, kona-bá prontidaun operacional, iha misoens bara-barak ne'eb'e sira atu kumpre.

Governu sei estabelese sistema ba jestaun rekursu umanu ba defeza, ho objetivu atu dezenvolve soldadu sira, ho insidênsia ba áreas lideransa, motivasaun, dezempeñu, koezaun no kbiit atu toma desizoens. Governu sei buka aumenta nível koordenasaun no kooperasaun, entre F-FDTL ho PNTL, hodi define, klaru liu, knáar no responsabilidade instituisaun ida-idak nian.

Governu sei fortalese Institutu Defeza Nasional (IDN) atu kumpri didiak knáar ne'ebé hetan.

Governu kompromete atu apoia veteranus sira, hodi hetan sira-nia reforma, ho dignidade ne'ebé sira merese. Governu mos sei kontinua konsidera, atu feto sira bele simu knáar, ne'ebé boot tan, iha defeza nasional.

Governu sei dezenvolve no kapasita *Companhia de Engenharia* ba F-FDTL nune'e partisipa ativamente iha dezenvolvimentu nasional. Governu sei halo esforsu hotu-hotu, atu F-FDTL bele partisipa iha operasoens ba manutensaun de paz, iha Nasoens Unidas nia ókos. To'o 2015 aumenta kapasidade, iha Timor-Leste nia sistema, kona-bá Komandu, Kontrolu, Komunikasoens, Komputadores no Informasoens (K4-I). Governu mos sei konsidera possibilidade sira, atu aumenta Timor-Leste partisipasaun, iha exersísus militares rejionais no internasionais.

IV. Siguransa

Governu sei implementa planu estratéjiku abranjente ida, ba longu prazu, atu garante dezempenhu ne'ebé diak liu, husi Timor-Leste nia seitor siguransa, iha nia responsabilidade kona-bá hametin paz, siguransa no estabilidade ba povu tomak.

Ba área siguransa interna, governu sei serbisu ho baze iha Planu Estratéjiku Dezenvolvimentu ba 2030. Iha mandatu ida ne'e, Governu sei konsentra nia esforsu iha Fortalesimentu no Konsolidasaun ba Baze Siguransa nian, hodi aktua iha pilares rua, ne'e distintos (*katak, ketak-ketak*): kontinuasaun ba "Reforma no dezenvolvimentu Instituisoens Siguransa" nian, no ba konsolidasaun "Ordem no Siguransa Públika".

Tanba ne'e, iha tinan lima mai, sei kontinua dezenvolve esforsu, atu aperfeisoa kapasidade operacional efetiva, iha prevensaun no investigasaun krime, iha konsolidasaun siguransa públika no kontrolu fronteirisu. Sei mós enkoraja nafatin modelu polisiamentu komunitáriu, hodi nune'e, estabilidade no siguransa públika maka, sei sai nafatin responsabilidades fundamentais ba PNTL.

Governu sei estabelese planu de rekursu humanus no profisionalizaun iha instituisoens siguransa nian, hodi orienta rekrutamentu ho formasaun atu, nune'e, bele fó resposta ba nesesidade sira, atuais no futuru.

Iha tinan lima ne'e nia laran, governu sei estabelese rejime de karreira, ne'ebé klaru liu ba PNTL, atu bele permite absorve (*ka simu tan*) rekursu foun, ne'ebé vokasionadus (*ka iha vontade no neon diak*) duni, atu servi instituisaun ida ne'e, hodi bele ona liberta sira ne'ebé, ladun vokasionadus ka sira ne'ebé ultrapassa tiha ona idade reforma. Nune'e, governu sei la tolera, iha PNTL nia laran, membrus afiliadus ba Artes Marsiais, ho mós membru sira ne'ebé iha atividade ka ligasaun ho partidu politiku sira.

Iha tinan lima mai né, sei estabelese Sentru Nasional Operasoens nian, atu bele tau matan diak liu ba Siguransa Rodoviária, no sei dezenvolve rekursu humanus ba área ida ne'e, atu bele hatán ba dezafiu sira, ne'ebé boot no barak tan, kona-bá trânzitu iha Timor-Leste.

Governu sei konklui mós programa de apoiu, iha ekipamentu no iha nesesidade profesionais, ba Protesaun Sivil, liu-liu ba Bombeiros sira, ho hanoin atu aumenta tan, ba distritu tomak.

Governu sei fortalese mós Diresaun Nasional Prevensaun Konfliktus Komunitárius, atu bele konsolida konfiansa, no hametin lei no ordem, iha ita-nia comunidades sira-nia let.

V. Negosiu Estranjeiru no Relasaun Bilaterais

Timor-Leste hamrik iha lokalizasaun jeográfika ida, ne'ebé estratéjika tebe-tebes, tanba ne'e, Timor-Leste nia rikusoin, husi rekursu naturais, no mós Timor-Leste nia siguransa, sei depende ba kapasidade atu mantein relasionamentu positivu, ho rai viziñu no rai-belun sira.

Governu sei kontinua dezenvolve relasionamentu espesiais ho rai-viziñu ne'ebé besik liu, Indonezia ho Australia, hanesan mós ho parseirus dezenvolvimentu no ho rai-belun, namkari iha mundu. Sei kontinua reforsa relasoens bilaterais ho parseirus no sei halo nafatin esforsu, atu sai membru ba Asosiasaun Nasoens Sudeste Asiátiku (ASEAN), no atu estabelese relasoens foun ba kooperasaun no amizade, iha rejiun Ásia-Pasífiku no seluk tan.

Timor-Leste fiar katak, multilateralismu maka mekanismu efikaz duni atu resolve problemas globais. Nun'e, V Governu Konstitusional sei kontinua partisipa ativamente, iha fora (*katak, instituisoens*) multilaterais, ho destake ba Assembleia-Jeral, Organizasaun Nasoens Unidas nian, nune'e mós iha instituisoens ho organizasoens internasionais relevantes, atu aborda intereses mundiais, hanesan direitus humanus no demokrasia, meio-ambiente, kombate terrorismu internasionais no krimes transnasionais, inklui mós reforma iha Konselhu de Siguransa.

Iha 2014, Timor-Leste mak sei prezide CPLP, nuné ita sei kontinua serbisu besi-besik liu ho grupu importante nasoens sira ne'e. Governu mós sei lidera no apoia nafatin grupu nasoens frájeis sira, ne'ebé hanaran "g7+".

Governu kontinua kaer metin ba i prinsípiu konstitusional, kona-bá relasoens amigáveis ho países iha mundu tomak, la haré ba dimensaun (*ka boot ka kiik*), lokalizasaun (*iha ne'ebé*) no ideolojia.

Sei fó kontinuidade ba Timor-Leste nia relasionamentu ne'bé diak ho Estados Unidos da América, ne'ebé fó mós kontribuisaun makáas ba Timor-Leste nia siguransa no desenvolvimentu. Sei mantéin mós relasionamentu, ne'ebé forte no pozitivu, ho Japaun, Xina no Koreia, ne'ebé sai hanesan potênsias ekonómiku boot, iha ita-nia rejiaun. Governu mós sei serbisu makáas, atu hametin lasus kooperasaun ho rai-belun sira, iha CPLP no ASEAN, nune'e mós ho Cuba, Nova Zelândia no Irlanda.

VI. FM nia Sumariu Monitorizasaun

a) Paz no Estabilidade

Hafoin liu tiha krizi polítika no militar iha tinan 2006, governu Aliansa Maioria Parlamentar (AMP) assume responsabilidade polítika no governasaun ba desenvolvimentu Timor-Leste. Paz no estabilidade Timor-Leste atinji ona iha tinan lima nian laran ho biloens lima no rekopera fila fali sosiedade nian hakmatek no seguru iha sira nia atividade lora-lora. Tendensia konfliktu balu nonok hela iha sosiedade nia leet tanba Timor-Leste sei iha osan naton atu rezolve problema sira ne'ebé povu infrenta maibe fundu mina rai hotu iha tinan hirak oin mai.⁵ Agora dadauk governu gasta osan la ho disiplina signifika gasta osan boot maibe povu la sente nia impaktu. Seitor hotu-hotu iha desenvolvimentu Timor-Leste sei problematiku hela hanesan edukasaun, saúde, agrikultura, ekonomia ba krisaun kampu traballu. Seitor produtivu sira governu la iha investimentu ne'ebé diak ba sustentabilidade desenvolvimentu Timor-Leste, sei depende ba fundu minarai hanesan rekursu úniku no la renovavel.

Aprezentaun ida iha Centro Convensaun Dili (CCD) iha lora 01 Juñu 2012 mai husi Ministériu Finansa kona-bá susesu governasaun AMP nia ne'ebé hatur iha prinsípiu balu maka governu rezolve problema deslokadu, petisionariu no rekopera no mantein paz no estabilidade

⁵ Deklarasaun Sosiedade Sivil ba Enkontru Timor-Leste ho Parseiru Dezenvolvimentu iha 2012. <http://www.laohamutuk.org/econ/12TLDPM/FONGTILtoTLDPM14May2012Te.pdf>

ne'ebé nu'udar pre-kondisaun prinsipal ba dezenvolvimentu Timor Leste atu sai nasaun prosperiu.⁶ Esforsu seluk reforma ba seitor siguransa nian ne'ebé afetadu husi krizi 2006. Buat seluk ne'ebé governu konsege maibe duvidas iha realidade moris povu nian maka dezenvolvimentu ekonomiku ne'ebé konsege atinji kresimentu ekonomiku ho número boot maibe realidade moris povu nian sei muktik hela iha seitor hotu-hotu. Maske iha tinan lima nia laran governu gasta ona biloens lima ba dezenvolvimentu Timor-Leste.

Konflitu iha nivel horizontal kontinua akontese, nu'udar impaktu mai husi dezempregu kada tinan kontinua aumenta, tuir dadus ne'ebé Sekretaria Estadu Formasaun Profesional no Empregu (SEFOPE) rejistu hamutuk 20.000⁷ ne'ebé implika mosu grupu deskuinesidu sira halo asaltu no grupu krimi organizadu sira.

Paz no estabilidade ohin loron Timor-Leste bele atinji maibe sei iha diskontenti balu ne'ebé sei ejiji nafatin ba governu atu rezolve. Grupus petisionariu ne'ebé lidera husi eis-Tenenti Gastão Salsinha sei ejiji nafatin ba sira nia estatu ne'ebé to'o agora seidak klaru⁸ maske elementu petisionariu seluk hetan ona pakote rekoperasaun, eis deslokadu sira sei ejiji nafatin sira nia direitu ba pakote rekoperasaun ne'ebé to'o agora seidak hetan.⁹ Konflitu grupu arte marsial la iha ona, ne'ebé governu suspende iha 22 Dezembru 2011 no Konsellu Ministru foti desizaun suspende atividade arte marsiais hotu iha Timor-Leste husi tinan ida to'o tinan tolu maibe sei iha potencia akontese iha futuru tanba depois suspensaun ramata governu sei halo saida?

Pontu prinsipal seluk ne'ebé sei belit hela iha Timor-Leste ne'ebé sempre iha tentasaun ba paz no estabilidade Timor-Leste nian maka prosesu polítiku no demokratizasaun. Prosesu ida ne'e, iha eleisaun Timor-Leste nian dalabarak lider polítiku no sosiedade tomak kestiona kona-bá paz no estabilidade iha eleisaun. Timor-Leste hakat ona eleisaun datoluk parlamentar no prezidensial, eleisaun ba Assembleia Konstituante iha tinan 2001 ne'ebé ikus transforma ba Parlamentu Nasional (PN) no eleisaun prezidensial iha tinan 2002 la'o ho hakmatek no paz. Eleisaun prezidensial no parlamentar iha tinan 2007, impaktu boot ba paz no estabilidade Timor-Leste, povu sai vitima lakon nia riku soin, lakon nia hela fatin, desloka husi nia hela fatin ba fatin seluk no ema balu mate. Nu'udar konsekuensia husi prosesu polítiku no demokratizasaun ne'ebé povu seidak maduru iha política no linguajem política sira husi lider polítiku ne'ebé provoka estabilidade, to'o iha eleisaun prezidensial no parlamentar 2012.

b) Defeza

Iha seitor defeza nian partikularmente forsa armada FALINTIL-FDTL ne'ebé governu dezenvolve no konsolida forsa armada ida ne'ebé transforma husi forsa girilia ba forsa konvensional. Investimentu ba rekursu umanu, infraestrutur, fasilidade, lejislasaun, instituisaun iha nivel komponente komandu nian no kooperasaun bilaterais sira. Maske sei iha limitasaun oin-oin ba forsa armada nian dezenvolvimentu maibe kontinua evolui no hatur mapa Timor-

⁶ <http://www.jornalbisnstimor.com/id/berita/288-kuartu-governu-konsege-susesu-ih-prinsipiu-7>

⁷ Jornal Nacional Diario. Kinta, 13 Setembru 2012

⁸ Telejornal Tetun Radio no Televizaun Timor-Leste (RTTL). Inisiu tinan 2012

⁹ Telejornal Tetun Radio no Televizaun Timor-Leste (RTTL). Setembru 2012

Leste nian iha mundu liu husi partisipasaun operasaun misaun Nasoes Unidas nian. Portugal hanesan nasaun amigu istoriku ho Timor-Leste hanesan comunidade ida koalia lian portugues ka CPLP kontinua halo promosaun ba Timor-Leste iha mundu, ne'ebé F-FDTL integra iha forsa armada potugueses nian hala'o operasaun manutensaun paz iha Sudaun do Sul.

Iha prosesu dezenvolvimentu forsa armada hatur mos estudu estratejiku ida ne'ebé ikus kontempla iha dokumentu Estudu 2020 ba interese estratejiku defeza nasional nian ne'ebé difini dezenvolvimentu forsa armada nian to'o iha tinan 2020. Ikus IV Governu Konstituisional, partikularmente Sekretaria Estadu Defeza (SED) hatur gabeti 2020 iha estrutura SED nian atu implementa planu ida ne'e. Iha peskiza ida pública tiha ona iha tinan klaran 2012 nian, husi Organizasaun *Dili Institute of Strategic and International Studies* (DISIS)¹⁰ ne'ebé kontempla kona-bá Tansá Timor-Leste Presiza Polítika Defeza Foun? Iha relatoriu ne'e ho nia prespetiva ba Estudu 2020 deskrebe katak governu Timor-Leste presiza polítika defeza foun ba interese estratejiku Timor-Leste nian tanba mudansa estratéjiku iha rejiaun no mundu. Tanba ne'e prosesu dezenvolvimentu forsa defeza sei kontinua mosu inkoerênsia entre elementu tolu iha estratejia: interese estratéjiku, kapasidade Ita-nia forsa hodi atinji interese sira ne'e, tanba orsamentu ne'ebé kiik kontinua sai impedimentu ba exersisiu professionalizasaun forsa defeza. Tanba ne'e Timor-Leste presiza polítika defeza ida foun no klaru ne'ebé refleka duni situasaun aktuál Timor-Leste, no evolusaun tomak iha rejiaun no mundu.

Iha âmbito dezenvolvimentu F-FDTL nian, dezafiu seluk iha polítika defeza nian maka iha tinan 2010 governu sosa ró rua husi Xina maibé la ho estudu ruma atu hola ró rua ne'e. Implikasaun boot ba operasaun no manutensaun ró rua ne'e, tanba ró rua ne'e la bele halo operasaun iha kosta sul no manutensaun sei problematiku hela. Tanba sa? Tanba portu temporariu ne'ebé iha tinan 2010 governu aloka ona orsamentu maibe to'o agora seidauk finaliza, pior liu tan Kompañia ne'ebé responsaliza ba obra ne'e abandona hela. To'o públikasaun relatoriu ne'e portu ne'ebé Kompañia *Lifese Engeenering* konstrui tohar tiha ona no seidauk rehabilita. Iha prosesu ida ne'e impaktu ba orsamentu jeral estadu nian, tanba governu gasta ona osan miloens 8 maibe rejultadu la iha qualidade.

c) Siguransa

Reforma ba seitor siguransa kontempla tiha ona iha programa IV governu konstituisional transformasaun Ministériu Interior unifika ba Ministériu Defeza no Siguransa (MDS) no ezejuta husi Sekretaria Estadu Siguransa (SES). Iha programa V Governu Konstituisional kontinua "reforma no dezenvolvimentu instituisoens siguransa" nian, no ba konsolidasaun "ordem no siguransa pública.

Dezenvolvimentu instituisoens siguransa nian, partikularmente instituisaun forsa polisial, hatur tiha ona iha Dekretu-Lei Nú. 16/2009, loran 18 fulan Marsu Lei Organika Polisia Nasionál Timor-Leste (PNTL). Ideias reforma no dezenvolvimentu lori progresu ba instituisaun PNTL,

¹⁰ Tan sa Timor-Leste Presiza Polítika Defeza Foun? Autor ba artigu ne'e Francisco Lemos dos Santos. Publikadu iha: <http://www.disis-tl.org/wp-content/uploads/2012/08/Politika-Defeza-Foun-Timor-Leste.pdf>

reforma instituisional, lejislasaun, estruktural no hatur hikas konfiansa povu nian ba instituisaun PNTL. Prova estra-ordinaria ida ne'ebé instituisaun PNTL hetan hikas konfiansa maka eleisaun prezidensial no parlamentar 2012 ne'ebé garante siguransa iha teritoriu tomak.

Maibe sai dezafiu ba dezenvolvimentu PNTL maka sei mukit hela iha infraestrutur, facilidade sira iha komandu distrital no eskuadra polisia subdistrital ne'ebé sai hanesan nesesidade urjenti, presiza governu kompleta iha kurtu prazu. Viaturas barak maka governu sosa maibe sei konsentra deit iha komandu jeral nian kontrolu iha Dili. Unidade Polisia Fronteira (UPF) ne'ebé nia misaun halo patrulamentu iha fronteira la iha transporte no kondisaun seluk ba UPF seidak iha hanesan kazernas no facilidade seluk.

SES faila iha prosesu sosa ekipamentu ba PNTL, públiku debate makáas no kestiona prosesu sira ne'e. Komprova iha kilat ne'ebé sosa ba PNTL la iha kualidade, no uza ba treinamentu kilat hirak ne'e la funsiona normal. Pior liu tan responsabilidade ida ne'e SES ho Komandu PNTL dun malu deit. Iha sorin seluk, radio komunikaun (Motorola GP 338) ne'ebé sosa hamutuk 420 la uza hotu tanba baterai boot liu no Komandu PNTL entrega hikas ba SES.¹¹

Buat seluk ne'ebé sai hanesan debate públiku iha Timor-Leste maka jestaun no kontrolu ba kilat, evidensia hatudu katak PNTL seidak maneja kilat ho diak, no rezulta husi ne'e, dala ruma polisia tenke sai responsabilidade ba hahalok uza sala kilat ne'ebé hamate sidadaun sivil sira. Tuir lolos insidenti uza sala kilat bele hadia, Fundasun Mahein (FM) fiar katak hahalok uza sala kilat iha Timor-Leste kontinua as. Hetok at liu tan, iha loron 30 Jullu 2012 kilat ida husi PNTL lakon husi elementu PNTL ida nian liman. Maibe sai pergunta boot ida katak to'o agora ita la hatene kilat ne'e nian paradeiru. Fundasaun Mahein (FM) konsidera katak kilat lakon tanba sistema jestaun kilat kontinua iha problema ne'ebé sidauk hetan nia tratamentu diak.¹²

Hatur mos problema seluk ne'ebé iha SES nian responsabilidade, Dirasaun Nasional Prevensaun Konflikto komunitaria (DNPCK) no Departamentu Polisiamentu Komunitaria. Diferensia iha dirasaun no departamentu iha sekretaria ida nia okos maibe hare objetu ne'ebé hanesan. Tanbe ne'e SES presiza hare fila fali tafas sira ne'ebé kondus iha DNPCK no Polisia Komunitaria. FM nia rekomendasaun katak fortifika no instituisionaliza polisia komunitaria nu'udar hatur tiha ona iha Lei Organika PNTL nian ne'ebé nia misaun integra iha atividade comunidade sira iha nivel baze.

Husi prosesu reforma ne'ebé kontempla ona iha progrma V governu konstituisional kontinua reforma no dezenvolve seitor siguransa no nia baze maka Planu Estratejiku Dezenvolvimentu Nasional (PEDN). Fundasaun Mahein (FM) reafirma nia hanoin ba governu katak PNTL tenki iha dokumentu estudu estratejiku ba dezenvolvimentu PNTL, to'o agora PNTL seidak iha

¹¹ Jornal Nacional Diario. Segunda, 17 Setembru 2012

¹² Mahein Nia Lian Nú. 38, 13 Agostu 2012, Maneja ho Sala Maneja Kilat PNTL iha Timor-Leste. http://www.fundasaunmahein.org/wp-content/uploads/2012/08/MNL-no-38-13082012_KilatPNTL_tetun.pdf

dokumentu ne'e rasik ne'ebé kontempla kona-bá interese siguransa interna nian no ameasa sira ba estabilidade nasional.

Papel Polisia Tranzitu nian maka atu halo monitorizasaun no jestaun bá reforsa lei siguransa trafiku bá funsionamentu serbisu trafiku nian atu asegura siguransa iha estrada públiku. Maibé, rekursu umanu la suficiente atu halo monitorizasaun no jestaun ba reforsa lei siguransa trafiku nian. Nune'e mos prezisa apoiu facilidade no ekipamentu bá misaun polisia tranzitu nian hodi asegura knáar ida ne'e ho diak no fo atendentu diak bá comunidade.¹³

Nune'e mos Dirasaun Nasional Protesaun Sivil nian, liu-liu Bombeiros ne'ebé durante ne'e ejiji hela sira nian estatutu. No Problema pertinenti seluk maka infraestruturá báziku no facilidade bá korpu Bombeirus sira iha distritu, tanba iha planu atu rekruta tan elementu bombeirus sira maibé infraestruturá liu-liu edifisiu bá sira rasik seidak iha. Problema ironiku liu maka korpu Bombeirus sira ne'ebé iha ona mos seidak iha facilidade hanesan mobiliariu sira, viatura sira no facilidade sekertariadu nia hanesan computador, armariu no seluk ne'ebé to'o agora seidak iha.¹⁴

Problema seluk maka, durante siguransa sivil ne'ebé destaka iha edifisiu no instalasaun públiku sira maibé ladauk kontrola ho diak edifisiu no instalasaun sira ne'ebé iha. FM hare katak prezisa tebes fo apoiu bá instituisaun ne'e hodi nune'e bele enkuadra serbisu siguransa nasional ho diak. Dezafiu seluk ne'ebé durante ne'e Dirasaun Nasional Siguransa Edifisiu Públiku (DNSEP) hasoru maka, governu la iha atensaun makáas iha lidun orsamentu jeral estadu nian bá aspeitu facilidade administrativa no facilidade serbisu operacional korpu siguransa sivil sira hodi ezerse sira nia funsaun.¹⁵

d) Negosiu Estranjeiru no Relasaun Bilaterais

Timor-Leste hamrik iha lokalizaun ne'ebé estratejiku, ida, ne'ebé estratéjika tebe-tebes, tanba ne'e, Timor-Leste nia rikusoin, husi rekursu naturais, no mós Timor-Leste nia siguransa, sei depende ba kapasidade atu mantein relasionamentu positivu, ho rai viziñu no rai-belun sira.¹⁶

Iha ámbitu kooperasaun internacional partikularmente relasaun bilaterais ho estadu sira seluk ne'ebé fo apoiu ba desenvolvimentu seitor defeza no siguransa nian. Timor-Leste nia amigu istoriku maka comunidade koalia lian portugues ka CPLP ne'ebé continua apoiu Timor-Leste no halo promosaun ba forsa armada F-FDTL no integra F-FDTL iha misaun forsa portugueses sira

¹³ Mahein Nian Lian Nú. 33, 27 Abril 2012 Serbisu Polisia Tránsito no Siguransa Rodoviária. <http://www.fundasaunmahein.org/wp-content/uploads/2012/04/MNL-no-33-27042012-ServisuPolisiaTranzitu.pdf>

¹⁴ Mahein Nia Hanoin 02, 06 Agostu 2012. Política Ministériu Defeza no Siguransa Periodu 2007–2012. http://www.fundasaunmahein.org/wp-content/uploads/2012/08/MNH_02-06082012.pdf

¹⁵ Mahein Nia Hanoin 02, 06 Agostu 2012. Política Ministériu Defeza no Siguransa Periodu 2007–2012. http://www.fundasaunmahein.org/wp-content/uploads/2012/08/MNH_02-06082012.pdf

¹⁶ Programa V Governu Konstitusional nian Lejislatura 2012-2017. Díli, 26 fulan Agostu tinan 2012.

iha Sudaun do Sul. Kontinua apoiu dezenvolvimentu forsa armada no forsa polisial liu husi formasaun militar no polisial iha nivel oin-oin.

Amigu estratejiku sira ne'ebé kontribui makáas ba forsa armada no polisial, hanesan kontempla tiha ona iha programa V governu konstituisional katak sei fo continuidade ba relasaun ho Estados Unidos Amerika, Xina, Japaun, Koreaia do Sul ne'ebé fó mós kontribuisaun makáas ba Timor-Leste nia siguransa no dezenvolvimentu.

Viziñu sira ne'ebé besik ho Timor-Leste hanesan Australia, Indonezia, relasaun ne'ebé diak tebes no metin dadauk iha seitor hotu-hotu. Timor-Leste kontinua dezenvolve relasionamentu espesiais ho rai-viziñu ne'ebé besik liu, Indonezia ho Australia, hanesan mós ho parseirus dezenvolvimentu no ho rai-belun, namkari iha mundu. Sei kontinua reforsa relasoens bilaterais ho parseirus no sei halo nafatin esforsu, atu sai membru ba Asosiasaun Nasoens Sudeste Asiátiku (ASEAN), no atu estabelese relasoens foun ba kooperasaun no amizade, iha rejiun Ásia-Pasífiku no seluk tan.¹⁷

Pontu importante ida nivel kooperasaun bilaterais defeza no siguransa Timor-Leste nian maka mundu sai mudansa radikal hahu kedas Timor-Leste deklara ukun an husi Portugal iha tinan 1975, no iha buat barak maka sei iha mudansa tan wainhira UNMIT hakat sai husi Timor-Leste iha fulan Dezembru, ne'e sinal lakon interese ba Timor-Leste hosi comunidade internasional sira ho aspetu luan liu. Ida ne'e Naroman Foun ida ba Timor-Leste nia politika Estranjeriu iha biban ne'ebé relasaun bilateral signifikante boot tebes. Hasa'e forsa foun husi bloku rejional foun, Timor-Leste persiza halo adaptasaun ho lalais ba meus ida ne'ebé dinamiku ba rejional no mos ba mundu ho global. Ida ne'e sei involve lala'ok polítika diplomatika ho avansadu no sofisticadu iha seitor barak.¹⁸ Fundasaun Mahein (FM) rekomenda ba V governu konstituisional maka akordu iha koperasaun defeza no siguransa ne'ebé Timor-Leste halo ona ho estadu sira iha rejiaun no viziñu tenki lori ba Parlamentu Nasional halo aprovasaun.

VII. Konkluzan

Iha programa V governu konstituisional pratikamente hatur ona iha planu tinan lima nia laran (2012-2017) iha ámbitu programa defeza, siguransa, negosiu estranjeiru no relasaun bilaterais nian. Difinisaun sira ne'e kontempla tiha ona realidade ida ba seitor defeza no siguransa nian no presiza relasionamentu diak ho estadu viziñu sira iha rejiaun ba dezenvolvimentu Timor-Leste. Ikus liu, continuidade ba dezenvolvimentu seitor defeza no siguransa presiza ho estudu estratejiku ruma hodi hatur tuir evolusaun iha rejiaun no ne'ebé reflektá duni situasaun aktuál Timor-Leste.

¹⁷ Programa V Governu Konstituisional nian Lejislatura 2012-2017. Díli, 26 fulan Agostu tinan 2012.

¹⁸ Naroman Foun Ida Ba Timor-Leste Nia Politika Estranjeiru: Husi Prespetiva Seitor Seguransa Nian. <http://www.fundasaunmahein.org/2012/07/03/a-new-dawn-in-timorese-foreign-policy-from-the-security-sector%E2%80%99s-perspective/>

Bibliografia

Dokumentu:

Programa V Governu Konstitusional nian Lejislatura 2012-2017. Díli, 26 fulan Agostu tinan 2012

Konstituisaun Repúblika Demokrátika Timor-Leste. Titulu IV Kapítulu II Governu, Formasaun no Responsabilidade. Artigu 108, pontu 1.

Mahein Nia Hanoin 02, 06 Agostu 2012. Polítika Ministériu Defeza no Siguransa Periodu 2007–2012. http://www.fundasaunmahein.org/wp-content/uploads/2012/08/MNH_02-06082012.pdf

Mahein Nia Lian Nú. 38, 13 Agostu 2012, Maneja ho Sala Maneja Kilat PNTL iha Timor-Leste. http://www.fundasaunmahein.org/wp-content/uploads/2012/08/MNL-no-38-13082012_KilatPNTL_tetun.pdf

Mahein Nian Lian Nú. 33, 27 Abril 2012 Serbisu Polisia Tránsito no Siguransa Rodoviária. <http://www.fundasaunmahein.org/wp-content/uploads/2012/04/MNL-no-33-27042012-ServisuPolisiaTranzitu.pdf>

Naroman Foun Ida Ba Timor-Leste Nia Politika Estranjeriu: Husi Prespetiva Seitor Seguransa Nian. <http://www.fundasaunmahein.org/2012/07/03/a-new-dawn-in-timorese-foreign-policy-from-the-security-sector%E2%80%99s-perspective/>

Tan sa Timor-Leste Presiza Polítika Defeza Foun? Autor ba artigu ne'e Francisco Lemos dos Santos. Publika iha: <http://www.disis-tl.org/wp-content/uploads/2012/08/Politika-Defeza-Foun-Timor-Leste.pdf>

Deklarasaun Sosiedade Sivil ba Enkontru Timor-Leste ho Parseiru Dezenvolvimentu iha 2012. <http://www.laohamutuk.org/econ/12TLDPM/FONGTILtoTLDPM14May2012Te.pdf>

Media:

Telejornal Tetun Radio no Televizaun Timor-Leste (RTTL). Inisiu tinan 2012

Telejornal Tetun Radio no Televizaun Timor-Leste (RTTL). Setembru 2012

Jornal Nacional Diario. Segunda, 17 Setembru 2012.

Jornal Nacional Diario. Kinta, 13 Setembru 2012

<http://www.jornalbisnistimor.com/id/berita/288-kuartu-governu-konsege-susesu-iha-prinsipiu-7>